

# DE SCIRRHO.

T H E S E S

ANATOMICO-CHIRURGICÆ.

*QUAS, Deo juvante, & præside M. TUSSANO BORDENAVE, Artium & Chirurgiæ Magistro, Scholarum Professore Regio, Regiæ Chirurgiæ Academia Pro-Directore, Collegii antiquo Præposito, è Regiâ Scientiarum Academiâ, Academicarum Rhotomagensis & Florentinæ Socio, tueri conabitur SIMON-CLAUDIUS DELAIZÉ, Parisinus, in almâ Universitate Parisiensi Artium Liberalium Magister, Theseos Auctor.*

P A R I S I I S,

IN REGIIS CHIRURGORUM SCHOLIS,

*Die Sabbati vigesimâ-tertiâ mensis Julii Anno salutis 1774,  
à sesqui-Secundâ post meridiem ad septimam.*

PRO ACTU PUBLICO

ET

MAGISTERII LAUREA.



Typis MICHAELIS LAMBERT, Regii Chirurgiæ Collegii  
Typographi, viâ Cithareâ.

---

M, DCC, LXXIV.











D. O. M.  
T H E S E S  
ANATOMICO-CHIRURGICÆ.

---

**M**ULTIPLICI patet undequaque ruinæ fragilis & infirma corporis humani moles. Ipsi enim tum à viriosâ ipsius temperie, tum ab infesto corporum externorum concursu, ineluctabile seriùs ociùsve imminet periculum. Hinc scilicet diram trahit originem vastatrix numerosaque morborum terris incubantium cohors. Hinc, solutis naturæ legibus, devii aut insoliti nonnunquam vagantur & affluunt humores, quorum in aliquâ corporis parte coarctatâ collectione, morbus conflatur & increfcit, generalem tumoris sortitus appellationem. Varius autem pro variis, & causarum quibus gignitur, & partium quas supereminet, differentiis, tumor distinguitur. Quippè qui, vel à liquoribus, vel à dimotis è propriâ sede partibus, vel etiam ab externis corporibus generatus, molles alius, alius duras obsideat partes. Quæ quidem omnia Chirurgo campum aperiunt vastissimum, nobis per breviores temporis definiti limites aded non percurrendum, vix etiam ineundum. De unâ tantummodò specie tumoris, liquidorum congestu crescentis, differere nobis est animus.



Quisquis tumor præter naturam durus, doloris & inflammationis expers, circumscriptus, salvo quidem colore cutis, scirrhus dicitur. Illud autem nomen, ob duritiem, accepit à voce Græcâ, σκίρπος, quæ idem ac fragmentum marmoris sonat.

Plurima sunt scirrhi discrimina. Distinguitur enim in primitivum & consecutivum. Uterque autem modò simplex, modò compositus, modò complicatus esse potest. Primitivus dicitur, quandò scirrhus ab initio naturam induit; consecutivus verò, cùm alterius tumoris exitus evasit. Simplicem vocant, qui nec ullo alio tumore, nec ullâ lue, nec accidentibus stipatur; compositum, cui accrescunt alia apostematis genera, uti, verbi gratiâ, phlegmone, vel erysipelas, vel œdema; complicatum tandem, qui peculiari quodam contagio generatur & alitur. In perfectum & imperfectum etiam diviserunt nonnulli Auctores; priori nomine gaudet, si sensu carens, penitus induruerit; posteriori verò, si, paululùm dolens, nondùm omni fluiditatis beneficio destituatur.

In omnibus ferè corporis partibus externis internisque procreatur scirrhus; cujus tamen sedes in glandulis frequentior videtur. Quodquidem non mirum, si harum fabrica naturaque liquidi in eis secreti spectentur.

Glandulæ generatim definiuntur organa ex pluribus vasis & canaliculis glomeratim dispositis, telâque cellulosa nexis, conflata; quorum alia quibusdam liquoribus à sanguine secernendis, alia lymphæ elaborandæ destinantur. Ob diversam horum structuram, & diversos ob usus, tùm conglomerata, vel composita; tùm conglobata vel simplicia ab Anatomicis nominari solent.

Glandula Anatomicæ inspectioni subjecta, non solum omnis generis vasa, verùm etiam sibi propria, excretoria secretoriaque dicta variis implexibus intricata, cellulari textu connexa, membranaceo demùm involucri simul circumvoluta, glomeris instar exhibet. Verumtamen de intimâ glandularum texturâ diversè sentiunt Auctores. Quidam enim cum *Malpighio* existimant glandulam esse folliculum cavum, cujus latera plurimis constant vasculis, & in cujus cavitate oscula minimarum arteriolarum hiantia, quemdam à sanguine secretum deponunt liquorem, qui, in eo cavo collectus, è glandulâ per emissarium pro-



variis usibus stillat; illa autem simplex nuncupatur. Composita verò, quandò harum glandularum congeries, unâ communi membranâ vestita, in emissarium commune desinit. Alii, cum *Ruyschio*, sentiunt arteriosa vasa, è quibus conflatur glandula, abire in capillaria, quæ liquidum secernunt, statimque, vel extrâ partes immediatè, vel in majora devehunt emissaria. Celeberrimus *Ruyschius*, canaliculos in emissaria compositæ glandulæ desinentes Arteriarum esse continuos, affirmat.

Quamquam accuratis dissectionibus perspicacissimus naturæ Scrutator *Malpighius*, & in mirandâ stupendâque injectionum arte *Ruyschius* versatissimus, ima naturæ penetralia detexisse videantur; quisque tamen nimis generalem amplexus est opinionem, cum nullus in quibusdam glandulis percipiatur folliculus, quem in aliis deprehendere pronum est. Enimverò glutinosum liquidum percolantes glandulas attentè perpendenti ratione experienciâque probatur folliculorum existentia. In pituitosâ membranâ, verbi gratiâ, alis nasi, in arteriâ asperâ, bronchiis, buccâ, &c. glandulosa occurrunt corpuscula, quæ, vel levissimâ compressione, mucosum humorem exsudant. Undè cum *Boerrhaavio* inferri fas est secretam materiem in receptaculo quodam aliquandiù colligi. Vix enim concipi potest, tantam liquidi copiam in parvulis canaliculis naturaliter contineri, & stare: aliundè si mucosæ glandulæ hisce carerent folliculis, sufficienti quantitate non adesset depositus humor, quàm ut varios quibus demandatur usus præstaret; quin imò, hisce necessariis dotibus certè non polleret. Ex earum glandularum structurâ suam opinionem deprompsisse *Malpighium*, eamque ad alias accommodasse constat. Injections verò solertissimè à *Ruyschio* adhibitæ præclare demonstrant plerâsque glandulas, sive conglobatas, sive conglomeratas, coagmentari aggregatis vasis quæ in formam subtilissimorum penicillorum mirum in modum solvuntur; ita ut ex illorum continuatis extremitatibus secretoria simul ac excretoria nascantur emissaria. Illi autem penicilli cellulosâ membranâ cincti, totidem effingunt acinos, qui, inter se juncti, parenchymatis nomine gaudent.

*Malpighii* folliculos omninò renuit *Ruyschius*, sed immeritò, ut patet ex dictis. Glandularum vasa in infinitum divisa, à *Ruyschio* demonstrata celebrataque haud etiam meritò vicissim *Malpighius* negat. Absque



folliculis, quin etiam glandulis, quasdam fieri secretiones Anatomia edocemur. Quis enim non fatebitur liquorem corporis cavitatum internas superficies perpetuò irrorantem, -solis vasorum hiantibus extremis exhalari? Nulla profectò in his partibus glandularum aut folliculorum reperiuntur vestigia. Si glandulosa scrutemur viscera, hepar, scilicet, renes, testiculos, &c. innumera vasa flexa & reflexa cellulari textu plus minúsve obvoluta tantummodò intuebimur; inter secretoria & excretoria folliculi non exstant. Ex conglobatis, desunt aliis, aliis insunt folliculi.

Quibus expositis omnibus, diversas tum *Malpighii*, tum *Ruyschii* opiniones haud prorsùs esse rejiciendas rectè conjicitur. Folliculis verò muniantur glandulæ, vel non; ea est illarum structura, ea quorundam liquidorum indoles, ea tandem in iis lenta circulatio, ut eas facillimè scirrhus invadat.

Permultæ sunt scirrhi causæ: spissatio scilicet, coagulatio & exsiccatio lymphæ stagnantis in vasis, tum pro glutinosâ ipsius indole, quæ duro acidoque victu, necnon atrâ bile sæpè concrescit; tum pro variis vitiis quibus aliquoties inficitur ille liquor. Quibus accedunt inflammatio, lac hærens in mammis, consueti menstrui, hæmorrhoidaliseve fluxûs suppressio ac cessatio, ulcus præmaturè clausum, externa denique corpora, quorum actio modò vasa comprimit, debilitat aut angustat, modò liquidum in eis contentum aut infarctum condensat, & immeabile facit.

Diagnosis scirrhi, ubi in externis corporis partibus hæret, ex suprâ dictis facilè deprehenditur; difficiliùs quidem, si interiùs lateat. Attentè verò causas, effectus, eventus, loca, phænomena, mali diuturnitatem, ægrique temperiem consideranti, in utroque casu certior occurrit diagnosis, indèque proclivior prognosis. His enim perpensis, constat meritò magis metuendum esse scirrhum, humorum spissitudine, contagio, vel consueti cujusvis excreti subitâ suppressione, aut cessatione productum, quàm inflammatione, aliove tumore, aut quâlibet causâ exteriore. Pejor scirrhusa moles quæ magna quibus adjacet vasa comprimit; pessima verò, quæ in cancrum facessit.

Cùm ex lentâ congerie concreti liquoris in vasis ingurgitati scirrhum tuber proximè confletur, humores attenuare, diluere; pristinam



fluiditatem renovare, vim organicam vasorum languentem reficere præscribit indicatio therapeutica; ut, humore faciliùs permeante, impetretur resolutio. Cui verò, ut sæpiùs, obstat penè faxea tumoris durities, tunc ad curationem per scalpellum deveniendum.

Scirrhi therapeia in radicalem & palliativam generatim diduci potest.

Ad utramque instituendam, Hygiene, Pharmacia, Chirurgiaque, modò conjunctim, modò sigillatim conferunt. Hygiene enim, quænam sint in rebus non naturalibus eligenda aut vitanda docet. Pharmacia, saluberrima subministrat medicamina. Chirurgia deniquè necessarias operationes sagaciter adhibet. Cùm autem prima curationi tantùm fa-  
veat, non verò sufficiat; ad alias necessariò confugiendum est, ut, vel per resolutionem, vel per exstirpationem, quantum potis est, scirrhi medela ritè perficiatur.

Interna & externa medicamina Pharmacia suppeditat; sed misero ac ineluctabili fato, salutiferum adjicere ferrum aliquandò tenetur Chirurgia. Interna, diluentia, attenuantia, dissolventia, purgantiaque; externa verò, emollientia & resolventia nominantur. In eorum usu multùm prodest Chirurgi peritia; scirrhi enim status & natura sedulò consideranda, priusquàm ulla tentetur curatio. Si benignus, recens, neque nimius, neque scaber, loco idoneo situs, in corpore sano, & nondùm omninò durus appareat scirrhus, spes quædam affulget resolutionis, quam moliri operæ pretium est.

In primo gradu emollientia cum resolventibus competunt. In sequentibus verò, augmento scilicet, statuque, emollientia, per datum tempus; dein resolventia gradatim adhibita, curationem absolunt.

Inter emollientia quibus exterius uti solent, recensentur fomenta & cataplasmata ex farinis aut plantis emollientibus, irrigationes præsertim, & balnea ex aquâ tepidâ, quæ in vapores resoluta, scirrhosam partem omnemque humoris coitum sæpiùs emollit.

Solventium exterior usus fumos acidos, fomenta, cataplasmata, emplastraque resolventia dicta complectitur. Mercurii frictiones, & accensæ cinnabaris vaporem nonnulli prædicant. Apud *Galenum* præcipuè commendatur acetum, sive vaporum, sive fomenti more, sive emplastri formâ, cui tantam vim dissolventem & attenuantem tribuebat, ut plurima è suis ipsius emplastris, gummi ammoniacum, oppopanax,



sagapenum aceto diluta haberent. Quod experiētiā comprobatur; verūmenimverò gummi ammoniacum in aceto scillitico solutum, in resolvendis scirrhis pluries sibi successisse *Hildanus* affirmat. Juxta celeberrimum D. *Van Swieten*, saponis Veneti in lacte solutio, adeo spissa ut tenuiorem pulvem referat, spongiā excepta, scirrhus resolvendo plurimum profuit. Quidam Auctores tenuissimam plumbeam laminam tumori appositam volunt; metuendum verò, ne, nimis compressa & irritata parte, tumor inflammetur, necnon depraveretur humor. Ab aliis laudatur etiam sulphuris accensi vapor ad scirrhum emissus; cum autem pulmōni sit insensibilissimus, diligenter cavendum ne ab ægrotis cum aurâ trahatur.

Ex iis variis curandi rationibus, hæc nobis anteferenda videtur. Aquæ tepidæ vapor bis de die tumor admovendus, balneis, simulque vel cataplasmatibus, vel fomentis emollientibus, dein emplastris res solventibus primum lenissimis, subindēque acrioribus successivè utendum; non omissis generalibus internisque auxiliis: qualia, diætā, sanguinis missiones pro ægri ætate, temperie, viribus, morbiq; causâ plus minúsve repetitæ, diluentes incidentesque potus, lenissima purgantia, boli saponacei, sulphuris interior usus, diversæque mercurii præparaciones, quales, panacea, æthiops mineralis, & aquila alba.

Si verò his omnibus tum internis, tum externis ad resolutionem aptissimis, prudenter & doctè applicatis, invicta tamen scirrhusa moles obluetur, ultimum auxilium est scalpellum. Infestissima quidem est cunctatio; tunc enim intempestivo & pertinaciori remediorum usu gravius evadet malum, vel relictum, auctâ mole, vicinas partes inficiet, & fatali tandem plurium causarum concursu irritari, inflammari, brevique in pessimum cancrum mutari poterit.

Priusquàm autem extirpatio celebretur, attendendum est an majorum vicinæ vasorum insideat scirrhus, an partibus suppositis vel ambientibus penitus infixus & immobilis hæreat, an tandem nimis langueat æger cacochymiâ affectus, vel in cancrosum perversus humor totam sanguinis massam infecerit; exitialis enim fieret extirpatio.

Quandò recens, benignus, apteque situs adest non resolutus scirrhus, nulla mora est quin auferrivaleat. Quamvis enim pluribus & certissimis observatis clarissimi M. *Ledran*, inter Academica Chirurgorum



commentaria consignatis, constat extirpationem seriùs necnon efficacius fuisse celebratam; ad eam confugere tutius tamen arbitramur, ubi pertinax & perfecta tumoris durities omnem resolutionis spem abstulit, quàm non sine noxâ cunctari, donec oriantur accidentia. Pruritus igitur, dolor, inflammatio non exspectentur, ut scirrhus eximatur.

Sed, inquiunt nonnulli, nihil est cur tanti urgeat abscissio, si quidem hic tumor indolens nec valdè nocuus, nec molestus apparet. Aliundè in mammis interdùm per plures annos illum absque periculo non solum hæsisse, verùm etiam in interioribus corporis delituisse probatur experientiâ. Clariss. *Littre* invenit totum lienem putrefactum, neque tamen de ullo malo sanus & hilaris conquestus fuerat æger.

Hæc fanè non negamus; attendantur verò scirrhi indoles, & alteratio liquidi imminens, si, quacùmque de causâ, motus humorum acceleretur. Si, V. G., sæviat febris, vasa scirrhuso adjacentia, compressione coarctata velociori circulatione obstruuntur; mox sequitur inflammatio; tunc ex fluidorum ac solidorum appulsu & repulsu frequentius iteratis vehementior nascitur attritus; hinc in angustatis vasis plurimum augetur calor; hinc etiam effervescens iners congestaque moles brevi putrescit. Eodem malo minitantur aliæ causæ. In istâ autem luctuosâ conditione quantò difficiliùs morbus debellatur! Tota sanguinis massa cancroso nonnunquam vitata veneno extirpationem omninò rejicit, aut eam saltem paululò certiorè vix præstat. Præterea, principio minùs altè latèque diffusum scirrhusum tuber radicitus evelitur. In augmento verò & acerbatione, post extirpationem, in cancerum degeneratio fit pertimescenda, si enim vel minima pars scirrhi remanserit, recrescenti malo remedium pejus afferet.

Quibus autem omnibus rectè perpensis, meritò concludi potest tollendum esse citius scirrhum, quatenùs irresolubilem, antequàm vel levissima quidem immineant accidentia. Ut ut hæc sunt, in quibusdam circumstantiis, licèt instantibus, abscissionem improbandam non ducimus; è contrariò eam omittere nefas est, ut patet clarissimi *Ledran* felicibus experimentis.

Cùm autem eximendi scirrhi statuatur necessitas, quânam methodo hæc operatio debeat salubriùs absolvi, nunc paucis evolvam.

Absint cauteria, sive actualia, sive corrosiva, quorum actione concitior stagnantibus liquidis motus impertitur, indèque proximus can-



eri metus, nisi vi causticâ sufficienti scirrhus omninò consumatur. Tumorem, quod rariùs fit, pedunculo quasi affixum propendentem, Auctores quidam laqueo circumducto validè stringendum volunt, ut, sic exsuccus concidat; at indè tristis & pessima in cancrum mutatio quandoque pertimescenda.

Aliis ergo mediis ferrum videtur anteponendum. Duplici autem modo sectione scirrhus aufertur; vel enim, dissectis integumentis, quasi enucleatur, vel unâ cum integumentis simul & semel totus refecatur. Prior methodus in minoribus scirrhis nullibi cuti accretis; posterior verò, in majoribus & mobilitate destitutis, adhibetur; uti, V. G., quandò mamma tota scirrhusa abscinditur. Ut autem utraque rectè perficiatur, in eximendum quicquid scirrhusi fuerit potissima Chirurgi cura impendatur. Ablato scirrhuso, compressoque sanguinis effluxu, tanquam vulnus cum amissâ substantiâ deindè curatur.

Hactenùs de scirrhorum, vel per resolutionem, vel per abscisionem, curatione; nunc de eâ quam palliativam vocant, dicendum est.

Indolentia scirrhi ab ægro quandòque negligitur. Exstirpatio, doloris ideâ, sæpius recusat. Tunc si, vel vicinis partibus magis ac magis accreverit, vel majoribus vasis quàm proximè adhæserit, vel in cancrum abierit; ita ut integrè, & absque vasorum læsione tolli nequeat, aut, labefactis humoribus, in aliis corporis partibus complures scirrhi pullulent, non solum irrita, sed etiam periculosa institueretur operatio. In solâ igitur palliativâ curatione spes novissima reponitur; quamobrem, ut in eodem statu remaneat morbus, nec deteriorem exitum subeat, hæc omnia quibus, vel in toto corpore, vel in parte affectâ, motus humorum augetur, sunt sedulò vitanda. Emollientia, caustica, rodentiaque malum exacerbant; integumentorum enim cohesionem imminuunt, indomabilemque putredinem vicina depascentem suscitant, *Hildanus*, inveteratos scirrhos, emollientibus applicatis, in exulceratos cancos abire vidit. *Etmullerus*, nitri aceto dissoluti lotionem proposuit, ut in lapideam duritiem irresolubilis scirrhus convertatur; pertimescendum verò, ne acria exitiosam irritationem promoveant.

Dieta, interna & aliqua externa remedia palliando morbo conjunctim inserviunt. In victu, mollissima ac dulcissima quæque sumantur; decocta



( 9 )

decocta emollientia, temperantia, laxantiaque pro potu adhibeantur; acria verò, & calefacientia vitentur. Quidquid animi pathemata incitare valet, diligenter prævertatur; nata refrænentur. Si pruritus, vel dolor adsint, narcoticis & anodinis sedentur. Si scirrhus inflammari incipiat, plumbata remedia sunt prudenter tentanda; uti, V. G., acetum lythargirii aquæ copiâ dilutum, nutritum unguentum dictum, emplastrum diapompholigos. Omnis attritus caveatur, ne integumenta excorientur, ideóque mollissimâ alutâ scirrhusa pars vestiatur. Undè etiam, in mammarum scirrhis, loricas ex balenæ ossibus factas mulieres debent exuere, necnon à vehementiori corporis exercitio sese abstinere, cum à pectorali musculo supposito tunc agiteretur scirrhus.

Quidam Auctores, ad inflammationem scirrhoi debellandam, plumbeam tenuem lamellam argento vivo perfricatam, ad tumoris figuram accommodatam prædicant; verùm, si mercurialia etiam blanda diutius admoveantur, incauto illorum usu metuendum est, ne humorum motu adaucto, malum in pejus ruat.

Peccantis temperiei emendandæ necessitas, diætam, & medicamenta diversis vitiis aptissima requirit. In atrabilariâ igitur, mel, fapo Venetus, herbarum decocta, qualia ex cichoreo, endiviâ, fumariâ, & similibus composita, tenaces solvunt humores. Si verò lateat, vel scorbutica, vel strumosa, vel venerea, vel quævis alia lues, remediis pariter idoneis debellanda, sin minùs mitiganda, ne morbus jam gravior, promptiùs cum mortifero cancro commutetur.

F I N I S.



